

**Suliffeqarfissuit immikkoortortallit, suliffeqarfissuarni piginnittut aalajangersimasumillu ingerlatsiviusut akornanni nakkutigisaasumik nussuisarnerit akiinik aalajangersaasarnerit pillugit malitassat nalilersoqqissaaqqullugit inernalu UKA2019-imi agguaateqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut (“Transfer-pricing”). Matumani siunertarineqarpoq akileraartarnikkut pilersarutipalaalersorinnaanerit pinngitsoortinniarlugit malitassat sukateriffigineqarsinnaanerit, taassumalu ataani ulluinnarni ingerlatsinerit ataqpineqarnissaat. (Inatsisartuni ilaasortaq, Henrik Fleischer, Siumut)**

### **Akissuteqaat**

(Aningaasaqarnermut Nunanilu Avannarlerni suleqatigiinnermut Naalackersuisoq)

Aallaqqaasiullugu Naalackersuisut sinnerlugit pineqartoq aalajangiiffigisassatut siunnersuut Naalackersuisut pingaartinneqarlunnartutut isigisaat saqqummiunneqarmat qujassutigissavara.

Aalajangiiffigisassatut siunnersuutigineqarpoq nakkutigisaasumik aningaasanik nuussisarnerit akigittassaannik aalajangersaanissamut maleruaqqusat nalilersorneqarsimanerannik Naalackersuisut UKA 2019-imi agguaassinissaannik peqquneqarnissaat.

Siunnersuuteqartup siunnersuummut tunngavilersuutigaa amerlasuutigut isumaqartoqartartoq ingerlatseqatigiiffiit ilaat Kalaallit Nunaanni annikinnerusunik akileraarteqarniarlutik akileraartarnikkut annertuumik pilersaarusiortartut.

Maleruaqqusat tamatumunnga malitassat aningaasarsianit akileraarutit pillugit Inatsisartut inatsisaanni pingaartumik § 36 a-mi § 36 b-milu takuneqarsinnaapput. § 36 a-mi peqqussutaavoq susassaartut nakkutiginninnerminni akuliuttussaannnginnertik mianeralugu iliuuseqartarnissaannut. § 36 b-milu aalajangersagaalluni akileraartussaasup pisussaaffigigaa nakkutigisaasumik aningaasanik nuussisimamerminik nammineeirluni nalunaarusiornissani uppernarsaasiornissanilu.

Aalajangiiffigisassatut siunnersuummi pingaartumik pineqarpoq akileraartussaasut § 36 b-mi aalajangersakkat malillugit uppernarsaasiortussaanerit. Aalajangersagaq malillugu suliffeqarfiit nakkutigisaasumik aningaasanik nuussisimanerminnik uppernarsaasiortussaapput, qinnuiginnittoqarpallu uppernarsaamminnik akileraaruseriffimmut nassiussisussaallutik.

Suliffeqarfiit uppernarsaasiortussaanerit pillugu Inatsimmi ullumikkut erseqqissunik aalajangersagaqanngilaq. Inatsimmulli nassuiaatini allassimavoq uppernarsaatit arlaannaannulluunniit attuumassuteqaratik susassaartut isumaqatigiissutigisimasinnaasaannut naapertuuttumik akigititat atugassarititalu nalilersorneqarnissaannut tunngavissiisinnaassasut. Taamaattoq piumasaqaataavoq suliffeqarfiit nakkutigisaasumik aningaasanik nuussisarnerminni akigititaminnik atugassaritaminnillu qanoq aalajangersaasimanerminnik nassuiaasiussasut. Aallaaviatigut akilerartussaasup nalilertussaavaa uppernarsaasiortoqaqqinnissaanut pisariaqartitsisoqarnerisat. Inatsimmulli nassuiaatini erseqqissarneqarpoq akileraaruseriffiup pingaartissagai nakkutigisaasumik aningaasanik nuussinissamut OECD-p maleruaqqusai.

Akigititat atugassarititalu naammaginatsumik uppernarsaasiorneqarsimanersut pillugit akileraaruseriffiup naliligai taamaalilluni toqqammavigineqassallutik. Naammaginatsumik

uppernarsaasiortoqarsimangippat imaluunniit akuliuttussaanginnermik tunngaveqarnissamik malinninnissaq pisimangippat Akileraartarnermut Aqutsisoqarfik uppernarsaatit avaqqussinnaavai akileraarutigullu naqqiilluni.

Aallaqqaataani oqaatigineqartutut aalajangiiffigisassatut siunnersuut pineqartoq Naalackersuisunit pingaaruteqarluinnartutut isigineqarmat.

Taamaammat tamatuma malitsigisaanik ataatsimiinnermi matumani siunnersuut, imm. 191, Naalackersuisut saqqummiuppaat, tassani pingaarnertut siunnerfiulluni § 36 b-mi nakkutigisaasumik aningaasanik nuussisarnerup uppernarsaasiornissaa pillugu maleruaqqusat sukateriffigineqarnissaat.

Ilaatigut uppernarsaasiortussaannermit OECD-p maleruaqqusaanut inassuteqaataanullu nutaanut siunnersuut naapertuuppoq. Taamaalilluni siunnersuummi § 36 b-mi aalajangersakkat malunnartumik allannguuteqarnissaat pineqarpoq.

Inatsisissatut siunnersuummi pingaarnerit ilaattut Naalackersuisut suliffeqarfiit uppernarsaasiornissaanut maleruaqqusanik erseqqinnerusunik aalajangersaanissamut piginnaatinneqarput. Siunnersuut akuerineqassappat maleruaqqusanik uppernarsaasiortussaannermit OECD-p maleruaqqusaanut naapertuuttunik aalajangersaanissaq siunertaavoq. Tassa uppernarsaasiornissamut erseqqinnerusunik piumasaaqateqartoqalissaaq. Uppernarsaatit ataatsimoorluni uppernarsaatinut nunanullu pineqartunut uppernarsaatinut immikkoortillugit avinneqassapput ilaatigullu suliffeqarfiit aningaasaqarnikkut aaqqissugaanerannik, aaqqissuusaanerannik susassaqtullu nakkutigisaasumik aningaasanik nuussisimanerannik imaqaassallutik.

Aamma inatsisissatut siunnersuut nunani assigiinngitsuni suliffeqarfissuit 5,6 mia. kr.-t sinnerlugit kaaviiartitalit nunamit nunamut nalunaarusiortarnissaannik piumasaaqammik imaqarpoq.

Nalilerneqarpoq maleruagassat nutaat malillugit Akileraartarnermut Aqutsisoqarfik periarfissagissaarnerulissasoq suliffeqarfiit aningaasaqarnikkut aaqqissugaanerannik niueriaasiannillu tamakkiisumik takunnittarnissamut. Akileraartarnermut Aqutsisoqarfik taamaalilluni periarfissagissaarnerulissaaq aningaasanik nuusseriaatsinik assigiinngitsunik nakkutilliisarnerup ukkatarinissaanut.

Naalackersuisut susassaqarfiup ukkatarineqarnissaanik pisariaqartitsisoqarsinnaaneramik misissorneqartariaqarneranillu siunnersuuteqartup oqariartuutaa isumaqatigivaat.

Naalackersuisulli isumaqarput maleruaqqusanik UKA 2019-imut nalilersuinissaq siunertamut naapertuutinngitsoq. Inatsisissatut siunnersuut, imm. 191, taamatut isikkoqartillugu akuerineqassappat maleruaqqusat ulloq 1. januar 2019 maleruaqqusanik nutaanik taarserneqartussat nalilersorneqartariaqassapput. Aamma maleruaqqusat nutaat nalilersuinissamut tunngavissiisinnaasut naammaginartumik misilittagaqarfigineqassanngillat.

Pissutsit taakku tunngavigalugit Naalackersuisut siunnersuutigivaat:

*Ingerlatseqatigiiffiit suliffeqarfissuarnut attuumassuteqartut, aktianik amerlanernik peqartut ingerlat-siviillu aalajangersimasut akornanni nakkutigisaasumik aningaasanik nuussisarnerit akigititassaan-nik aalajangersaanissamut maleruaqqusat nalilersorneqarsimanerannik Naalackersuisut agguuassi-nissaat pillugu Inatsisartut aalajangiiffigisassaattut siunnersuut ("transfer-pricing"), imm. UKA2018/191 pillugu siunnersuummi maleruaqqusat ukiuni tallimani atuutereerneranni nalilersuisarnissamik imalik. Siunnersuuteqarnermi siunertarineqarpoq annikinnerusunik akileraaruteqarniarluni akileraarutit pillugit annertuumik pilersaarusiornissat pinngitsoortinniarlugit aalajangersakkat, tassunga ilanngullugu naalackersuinikkut akuliuttussaanginnermik*

*tunnngaveqarnissamik malinninnissamut maleruaqqusat sukaterneqartariaqarnersut aalajangiiffigineqarnissaat.*

Allannguutissatut siunnersuusiornermi pingaarnertut siunertarineqarpoq nalilersuinissap kinguartinneqarnissaa.

Nalilersuineq siunertamut naapertuutissappat maleruagassat nutaat sunniutaasa misilittagaqarfigilerneqarnerat, taakkununga ilanngullugu Akileraartarnermut Aqutsisoqarfiup suliat suliarisartagai aqutigalugit misilittakkat tunnngaviusariaqarput. Nakkutigisaasumik aningaasanik nuussisarnerit pillugit suliat nalinginnaasumik ukiuni arlalinni naammassiniarneqartarput, tassa allaffissornikkut suliassarujussuusarmata Akileraarutitik Aalajangiisartunut naggataatigut suliassanngortinneqarsinnaallutik aamma naggaterpiaatigut inaarutaasumik naammassiniarlugit eqqartuussivikkoortinneqarsinnaapput.

Ukiuni tallimangajanni atuutereersumi malittarisassanik nutaanik nalilersuinissamut kinguartitsineq nalilersuinissamut pitsaanerujussuamik tunnngavissiissaaq, taamalu maleruaqqusat sukateqqinneqarnissaannik pisariaqartitsisoqarnersoq taamaattoqassappallu allaffissornikkut atugassat qanoq innersut paasinarsissapput.